

1378 militum non parva in continentem exposita, ut pluribus locis hostem fatigaret. Ferunt levia peditum certamina per eos dies commissa, sed illa ipsa nulla memoria digna. Demum Victor longioris moræ impatiens urbem oppugnare aggreditur: sed conatus illi omnino irriti. Venetus non solum oppido non est potitus, sed ab Genuensibus (quorum vis ingens erat intra mœnia) cum cæde est ad naves repulsus: cecidit eo certamine Lucas Valarefius, patricii sanguinis homo. Victor suo incæpto frustratus, quia jam commeatus defecerant, nec erat quod ab urbe rei frumentariæ inopia laborante quicquam speraret, soluta obsidione, ante Jaderam rursus confedit, urbemque assidendo magis sollicitabat, quam premebat. Misit præterea triremes decem ad explorandos Arbensium animos: qui Catarensum primo, inde Sicensium casu consternati deditionem fecere. Ad urbem præsidio tuendam Franciscinus Contarenus Prætor est missus. Audita Tragurinae obsidionis solutione, confestim Patres quinque longas naves ad bellum instruunt, onerantque commeatu: mandant ad hæc, ut Jaderam ad Pisanum cum publico decreto irent, qui primo quoque tempore Tragurium rediret, nec inde prius abscederet, quam naves quæ in portu essent, siue armis siue fame expugnasset. At Ligur post priorem illam expugnationem majore aliquanto studio quam antea portum communiverat; quo accidit, ut hic quoque recentior conatus tam irritus sane fuerit, quam ille de quo ante diximus. Circumsedit classis in ancoris stans aliquot dies portum: sed fame simul ac frigore (instabat enim jam hyems) compulsus est Pisanus infecta re inde abscedere. Triremes in Histriam reductæ; unde quum ad Patres Pisanus scripsisset, vellent juberentque se cum tota classe domum hybernatum redire, an potius foris esse; placuit ob vicinum hostem ea hyeme classem domo abesse: quod certe non parum Reipublicæ obfuit. Milites & focii navales fame & frigore confecti, sine commeatu, quacuique proximum fuit, diversi abeuntes, classem valde infrequentem reddidere: quidam etiam fame consumpti di-